



## **PRAVILNIK O RADU DŽEMATA**

### **ISLAMSKE ZAJEDNICE BOŠNJAKA SJEVERNE AMERIKE**

#### **IME**

##### **Član 1.**

Ovim pravilnikom regulira se rad džemata koji su dio Islamske zajednice Bošnjaka Sjeverne Amerike (u daljem tekstu – IZBSA) i time ujedno dio Islamske zajednice u Bosni i Hercegovini.

#### **NADLEŽNOST**

##### **Član 2.**

Ovaj pravilnik je nadležan za sve džemate u okviru IZBSA.

Džemati su dužni da, u slučaju potrebe, usklade svoje džematske statute i pravilnike sa ovim pravilnikom.

#### **CILJ I SVRHA**

##### **Član 3.**

Cilj džemata je da svi njegovi pripadnici žive u skladu sa islamskim normama. Cilj džemata se ostvaruje promicanjem dobra i odvracanjem od zla.

Svrha džemata se postiže sljedećim aktivnostima:

- obavljanjem svih vjerskih dužnosti u skladu sa islamskim zakonom, Šerijatom,
- brigom o islamskom odgoju i obrazovanju svojih pripadnika i zalaganjem za očuvanje vrijednosti braka i muslimanskog porodičnog života,
- staranjem o vjerskim pravima muslimana i, u skladu sa svojim mogućnostima, osiguravanjem uvjeta svojim pripadnicima za izvršavanje islamskih dužnosti,
- organiziranjem djelatnosti kojima se stječe, štiti i uvećava imovina zajednice,
- saradnjom i razmjenom iskustava sa drugim islamskim zajednicama - suživotom sa drugim vjerskim zajednicama,
- zalaganjem za očuvanje kulture, jezika i tradicije Bošnjaka u skladu sa mogućnostima.



## **RAD I DOZVOLA**

### Član 4.

Rad džemata odvija se primjenom američkog Ustava o demokratskim institucijama. Rad džemata bazira se na dozvoli o registraciji od nadležnih organa, dodijeljenoj u skladu sa članom o općim neprofitabilnim organizacijama.

## **USTROJSTVO**

### Član 5.

Ustrojstvo džemata, shodno ustrojstvu Islamske zajednice kao i sve njene djelatnosti, temelji se na Kur'ani-kerimu i sunnetu Muhammeda, alejhis-selam, islamskoj tradiciji Bošnjaka i zahtjevima vremena.

Djelatnosti u džematu podliježu načelima zakonitosti, javnosti i odgovornosti, a rukovodne dužnosti podliježu islamskim načelima odgovornosti i pravednosti.

## **DŽEMAT**

### Član 6.

Džemat je osnovna organizaciona jedinica Islamske zajednice.

Odluku o formiranju džemata donosi Rijaset Islamske zajednice u BiH na prijedlog muftije za Sjevernu Ameriku, a na zahtjev inicijativnog odbora budućeg džemata.

Džemat čini skupina od najmanje 100 muslimanskih domaćinstava koji žive na jednom području i koji su međusobno povezani u izvršavanju zajedničkih islamskih dužnosti, ili manje od 100 domaćinstava koji su u stanju finansijski održavati džemat.

Organi džemata su skupština džemata i džematski odbor.

## **SKUPŠTINA DŽEMATA**

### Član 7.

Skupštinu džemata sačinjavaju svi muslimani i muslimanke bošnjačkog porijekla iz tog džemata, koji su članovi islamske zajednice i redovno plaćaju članarinu i koji su navršili 18 godina, s tim da jedna familija nosi samo jedan glas.



Skupština džemata bira: džematski odbor, delegate džemata u skupštini medžlisa i u skupštini IZBSA, te donosi važnije odluke koje se tiču organiziranja džemata i vjerskog života u džematu.

Na prijedlog džematskog odbora, skupštinu džemata saziva predsjednik džematskog odbora pismenim ili javnim pozivom članovima džemata.

Poziv sadrži mjesto, vrijeme i datum održavanja skupštine. Poziv mora biti upućen najmanje 21 (dvadeset jedan) dan prije održavanja skupštine.

Kvorum skupštine čini 10% prisutnih od ukupnog broja članova džemata.

Ako nema kvoruma, skupština se odgađa za dvije sedmice kada se održava bez obzira na kvorum.

Redovna izvještajna skupština održava se svake godine, a izborna skupština se održava svake četiri godine.

Vanredna skupština džemata saziva se po potrebi ili zbog vanrednih okolnosti.

## **DŽEMATSKI ODBOR**

### **Član 8.**

Džematski odbor ima od 5 do 9 članova, uključujući imama koji je po funkciji član odbora. Mandat članova džematskog odbora je četiri godine sa pravom ponovnog izbora neograničeni broj puta.

Džematski odbor osigurava uvjete za vjerski život u džematu.

Članovi džematskog odbora imaju jednakopravan glas.

Džematski odbor donosi odluke u okviru svoje nadležnosti te, po usvajanju i potpisivanju sekretara i predsjednika, unose se u posebnu knjigu odluka.

Imam zadržava pravo veta na svaku odluku koja je u suprotnosti sa osnovama islamskog učenja.

Način rada džematskog odbora utvrđuje se pravilom većinskog glasanja, poštivanjem odluka Rijasetu IZ-e BiH, usklađivanjem sa Statutom Islamske zajednice Bošnjaka Sjeverne Amerike i Ustavom IZ-e u BiH.

Izabrani džematski odbor obavlja svoju dužnost i poslije isteka mandata, sve do izbora, odnosno konstituiranja novog odbora.



## SASTANCI DŽEMATSKOG ODBORA

### Član 9.

Redovne i vanredne sastanke džematskog odbora saziva predsjednik.

Svaki član džematskog odbora dužan je da prisustvuje sastanku na poziv sekretara ili predsjednika džematskog odbora.

Sastanak džematskog odbora može se zakazati i telefonski.

Odluke u džematskom odboru donose se natpolovičnom većinom glasova.

Izabrani kandidat za džematski odbor daje pred svjedocima sljedeću izjavu: **"Ja (ime i prezime) kunem se Svemogućim Bogom da ću, dok budem član ovog džematskog odbora, služiti vjeri islamu i raditi za dobrobit ovog džemata. Bože, od tebe pomoć molim."**

## OPOZIV ČLANA DŽEMATSKOG ODBORA

### Član 10.

U slučaju da bilo koji član džematskog odbora ne izvršava svoje obaveze prema džematu, ili svojim radom ruši ugled džemata, može biti smijenjen odlukom dvotrećinske većine članova džematskog odbora.

Član džematskog odbora opoziva se ili razrješava dužnosti kada se utvrdi:

- da su njegovo ponašanje i rad u suprotnosti sa islamskim normama,
- da radi suprotno propisima i odlukama organa džemata,
- da na položaju ne izvršava osnovne obaveze za koje je izabran,
- da je svoj položaj zloupotrijebio,
- da je nesposoban da obavlja svoju dužnost,
- da tri puta neopravdano ne prisustvuje sastancima džematskog odbora.

## FUNKCIJE U DŽEMATSKOM ODBORU

### Član 11.

Funkcije u džematskom odboru su: predsjednik, potpredsjednik, sekretar i blagajnik.



Funkcije u džematskom odboru mogu obnašati članovi odbora koji poznaju bosanski i engleski jezik i koji posjeduju osnovno znanje za rad na kompjuteru.

Funkcije u džematskom odboru su na mandat četiri godine, od dana izbora na izbornoj skupštini džemata, osim imama koji je član odbora sve dok obnaša funkciju imama.

Svaka osoba koja je izabrana na funkciju za svoj rad odgovara džematskom odboru i može se opozvati i razriješiti dužnosti u džematskom odboru pod gore navedenim uvjetima.

Predsjednika džematskog odbora bira odbor većinom glasova na četiri godine i ima pravo ponovnog izbora na funkciju.

Predsjednik džematskog odbora vodi sastanke džematskog odbora, skupštine i iste saziva.

Potpredsjednik džematskog odbora zamjenjuje predsjednika u slučaju njegove bolesti, odsustva ili ostavke.

Sekretar vodi zapisnike sa sastanaka, čuva arhivu i pečat zajednice, potvrđuje sve dokumente džemata pečatom džemata.

Sekretar šalje obavještenja članovima džematskog odbora i članovima džemata, poziva na sastanke džematski odbor, šalje pozive za skupštinu, vodi evidenciju članova i vrši sve poslove vezane za sekretarijat.

Blagajnik obavlja sve uplate i isplate kako to traži džematski odbor, a u skladu sa propisima koji su na snazi u ovoj državi.

Blagajnik sav novac koji dolazi džematu iz bilo kojih izvora polaže na bankovni račun džemata, podnosi tromjesečni izvještaj džematskom odboru, prikazuje sve prihode i rashode koje je džemat imao i uopće vrši sve poslove vezane za blagajnu.

## **IMAM**

### **Član 12.**

Imam organizira vjerski život u džematu i održava kontakte sa javnošću u vezi sa vjerskim aktivnostima.

Imam treba poznavati engleski i bosanski jezik.

Na zahtjev džematskog odbora imama postavlja, premješta i razrješava reisu-l-ulema na prijedlog muftije, a na traženje džematskog odbora.

Imam u svome radu odgovara džematskom odboru i glavnom imamu.



Imam sa džematskim odborom potpisuje ugovor o radu, u kojem se reguliraju međusobna prava i obaveze, rok trajanja ugovora, i to na osnovu dekreta Rijasetu IZ-e BiH, kojim se dozvoljava dotičnom imamima da obavljaju imamsku dužnost.

Jednom godišnje džematski odbor analizira učinak i rad imama u skladu sa ovim pravilnikom.

Imam može biti samo lice koje dobije dekret od reis-ul-uleme IZ-e u BiH.

Prednost za rad u dijaspori imaju imami sa prethodnim imamskim iskustvom od najmanje 2 (dvije) godine.

### **IZBORI**

#### **Član 13.**

Izbori u džematu vrše se tajnim glasanjem između više kandidata.

Kandidati za džematski odbor su istaknuti i ugledni članovi džemata.

Komisija za izbore, zajedno sa imamom, dužna je odbiti kandidaturu lica koja ne ispunjavaju uvjete za izbor u organe džemata, odnosno džematskog odbora.

Aktivno biračko pravo u džematu ima svaki pripadnik džemata koji je navršio 18 osamnaest godina, koji izmiruje svoje obaveze u džematu i nosi jedan glas ispred porodice.

### **PASIVNO BIRAČKO PRAVO**

#### **Član 14.**

Svaki zaslužan i uzoran član džemata može biti biran u džematski odbor u skladu sa šerijatskim propisima, pod slijedećim uvjetima:

- da je redovan član džemata najmanje posljednje 3 (tri) godine bez prestanka.
- da je svojim zalaganjem za džemat poznat kao osoba koja je voljna staviti svoje vrijeme i znanje na raspolaganje džematu.
- da se uzdržava od velikih grijeha kao što su alkohol, blud, kocka i širk.
- da zna osnovne islamske propise i da svakodnevno prakticira islam.



## **ČLANSTVO I ČLANARINA**

### **Član 15.**

Član džemata može biti svaki musliman ili muslimanka na području džemata koji je napunio/la 18 godina.

Sekretar džematskog odbora vodi evidenciju o članstvu u džematu.

Iznos članarine se utvrđuje i po potrebi mijenja na skupštini džemata, a na prijedlog džematskog odbora.

Svi članovi jedne porodice računaju se članovima džemata ako iz jedne porodice ima bar jedan član džemata.

Pod porodicom se podrazumijevaju bračni supružnici sa djecom do stupanja djece u brak.

Prilikom stupanja u brak novoosnovana porodica je dužna da se zasebno učlani, neovisno od toga da li živi odvojeno od svoje porodice ili ne.

Sve kategorije socijalnih slučajeva kao i penzionisane osobe plaćaju članarinu u posebnom iznosu koji se utvrđuje na skupštini džemata.

## **PRESTANAK ČLANSTVA**

### **Član 16.**

Ako član zajednice nije platio članarinu 6 (šest) mjeseci, biće pismeno obaviješten o tome, a nakon još 6 (šest) mjeseci neplaćanja članarine prestaje biti članom džemata.

Ukoliko neko bez razloga odbije platiti članarinu, neće dobiti usluge imama, niti će u slučaju smrti biti ukopan na mjesto gdje se ukopavaju članovi džemata, dok se u njegovo/njeno ime ne izmire dugovi prema džematu.

Bilo koja usluga džemata ili imama džemata za osobe ili porodice koji nisu članovi džemata, nosi određenu finansijsku obavezu prema džematu čiju visinu utvrđuje džemat na džematskoj skupštini, a na prijedlog džematskog odbora.

## **ČEKOVI, IZVODI, DEPOZITI**

### **Član 17.**

Svi čekovi, izvodi i drugi oblici sredstava za plaćanje, evidencije izdate u ime džemata moraju biti potpisani od strane blagajnika ili nekog drugog koga džematski odbor ovlasti.



Sva novčana sredstva moraju biti deponirana u roku od 48 (četrdeset osam) sati na račun džemata u banci.

### **KNJIGOVODSTVO**

#### **Član 18.**

Rukovodstvo zajednice treba održavati uredne, ispravne i kompletne knjige i zapisnike o poslovima vezanim za zajednicu kao i generalne informacije o članovima, džematskom odboru kao i listu članova zajednice koji imaju pravo glasa.

Sve knjige zajednice mogu biti pregledane od strane džematskog odbora zajednice ili njegove komisije.

### **FISKALNA / BUDŽETNA GODINA**

#### **Član 19.**

Fiskalna ili budžetna godina počinje od prvog dana januara i završava trideset i prvog dana mjeseca decembra iste godine.

Krajem svake fiskalne godine pravi se finansijski izvještaj koji se usvaja na džematskoj skupštini.

### **PEČAT ZAJEDNICE I NABAVKA**

#### **Član 20.**

Džematski odbor brine se o nabavci pečata džemata koji će sadržavati znak Islamske zajednice, ime džemata i njegovo sjedište.

Džematski odbor se bavi nabavkom svih materijalnih sredstava za potrebe džemata.

### **ZATVARANJE I PREKID RADA**

#### **Član 21.**

U slučaju da džemat i aktivnosti vezane za džemat izgube svrhu i ne pomažu ostvarenju zadatih ciljeva i svrhe, džemat i aktivnosti će biti ukinuti.

Kompletna imovina postaje vlasništvo/vakuf IZBSA.





**PRAVOSNAŽNOST, IZMJENE I DOPUNE**

Član 22.

Ovaj Pravilnik stupa na snagu danom donošenja. Amandmani na ovaj pravilnik mogu se donositi samo na Skupštini IZBSA.

IZBSA

13246 N. 23<sup>rd</sup> Ave. Phoenix, AZ, 85053

21. novembar 2020. g./06. Rebiu-l-ahir 1442. h.g.

---

Dr. Hazim ef. Fazlić  
Moderator Skupštine  
Islamske Zajednice Bošnjaka Sjeverne Amerike